

নাম: মো: জাকির হোসেন

জন্ম তারিখ: ৬ জুন, ১৯৮৮

শহীদ হওয়ার তারিখ: ২১ জুলাই, ২০২৪

ব্যক্তিগত তথ্য:

পেশা : ব্যবসায়ী, কাজী ভিআইপি গার্মেন্টসের যৌথ সত্ত্বাধিকারী

শাহাদাতের স্থান : ঢাকা মেডিকেল কলেজ

শহীদেদের জীবনী

মো: জাকির হোসেনের জন্ম ১৯৮৮ সালের ৬ জুন, গাজীপুর জেলার কাপাসিয়া থানার চর দুর্লভ খাঁ গ্রামে। ছোটবেলা থেকেই তিনি ছিলেন আত্মপ্রত্যয়ী, পরিশ্রমী ও সাহসী। বাবা আব্দুস সামাদ ছিলেন একজন সৎ কৃষক, আর মা মোমেনা বেগম ঘর সামলানোর পাশাপাশি সন্তানদের আদর্শ মানুষ হিসেবে গড়ে তুলতে সবসময় সচেষ্ট ছিলেন। জাকির হোসেন পারিবারিক দায়িত্ব নিতে খুবই দক্ষ ছিলেন, আর তার সেই দায়িত্ববোধই তাকে একজন সফল ব্যবসায়ী হিসেবে গড়ে তোলে।

জাকির হোসেন গাজীপুরের কাজী ভিআইপি গার্মেন্টসের যৌথ সত্ত্বাধিকারী ছিলেন। ছোট একটি ব্যবসা থেকে শুরু করে তিনি জীবনের প্রতিটি ধাপে পরিশ্রমের মাধ্যমে উন্নতি করেছিলেন। তার ছিল একটি ছোট পরিবার। সাত বছর বয়সী ছেলে আব্দুর রহমান ও দুই বছরের ছোট ছেলে বাইজিদ। স্ত্রী ও সন্তানদের নিয়ে সুখী জীবনযাপনের স্বপ্ন ছিল তার, কিন্তু সেই স্বপ্ন পূরণ হওয়ার আগেই সব কিছু থেমে যায়।

আন্দোলনের প্রেক্ষাপট

২০২৪ সালের ১৯ জুলাই ছিল জাকিরের জীবনের এক ভয়াবহ দিন। বৈষম্যবিরোধী ছাত্র আন্দোলনের তীব্রতা তখন সারাদেশকে নাড়িয়ে দিয়েছিল আর উত্তরা ছিল পুলিশের বেপরোয়া গুলির ক্ষতবিক্ষত। ব্যবসায়িক কাজে গিয়েছিলেন উত্তরায়, কিন্তু সে কাজ শেষ করে ফিরে আসার সময় তার জীবন থেমে যায় পুলিশের গুলিতে। বিকাল ৩:৩০ টায় হেলিকপ্টার থেকে নিষ্ক্ষিপ্ত পুলিশের এলোপাথাড়ি গুলি তার পিঠে বিদ্ধ হয়। আশেপাশের মানুষজন তাকে দ্রুত ঢাকা মেডিকেল কলেজে নিয়ে যান, কিন্তু ২১ জুলাই ভোর ৪:৩০ টায় চিকিৎসাধীন অবস্থায় তিনি মৃত্যুবরণ করেন।

শহীদ জাকির হোসেনের মৃত্যু তার পরিবারের জন্য যেমন এক শোকের ঘটনা, তেমনি তার দুই ছোট সন্তানের জন্য অনিশ্চয়তা ও কষ্টের জীবন। তিনি ছিলেন পরিবারের একমাত্র উপার্জনক্ষম ব্যক্তি। তার পিঠে পাওয়া গুলির চিহ্ন এখনো তার আত্মত্যাগের নীরব সাক্ষী। তার নামে থাকা ৫ শতাংশ জমির মধ্যে ছোট একটি বাড়ি ছাড়া আর কোনো সহায়-সম্পত্তি নেই। এছাড়া ব্যবসার জন্য নেওয়া প্রায় দুই লক্ষ টাকা ঋণও রয়েছে।

আজ তার দুই ছেলের শিক্ষাজীবন ও ভবিষ্যত অন্ধকারে নিমজ্জিত। তার স্ত্রী, যিনি একসময় স্বামীকে সাপোর্ট দিয়ে সংসার সামলাতেন; এখন অসহায় আর নিরুপায় পরিস্থিতির সম্মুখীন।

শহীদ মো: জাকির হোসেনের আত্মত্যাগ কেবল তার পরিবারকেই নয়, সমগ্র জাতিকে স্মরণ করিয়ে দেয় যে স্বাধীনতার সংগ্রামে, গণতন্ত্র ও ন্যায়বিচারের জন্য তার মতো হাজারো সাহসী মানুষ প্রাণ দিয়েছেন। তার মৃত্যু আমাদের মনে গভীর শোকের জন্ম দেয়, তবে তার এই আত্মবলিদান আমাদের মনোবল আরও দৃঢ় করে তোলে।

ঘটনার বিবরণ

১৯ জুলাই ২০২৪, শুক্রবারের সেই দিনটি ছিল শহীদ মো: জাকির হোসেনের জীবনের শেষ দিন। বৈষম্যবিরোধী ছাত্র আন্দোলন তখন সারা দেশে বিক্ষোভের দাবানল ছড়িয়ে দিয়েছিল। শেখ হাসিনার স্বৈরাচারী সরকারের বিরুদ্ধে মুক্তিকামী জনতা রাজপথে নেমে আসছিল। তবে পরিস্থিতি ক্রমেই ভয়াবহ হয়ে উঠছিল, কারফিউ জারি ছিল, ইন্টারনেট এবং সকল সামাজিক যোগাযোগমাধ্যম বন্ধ। কোথায় কী ঘটছে, কেউই সঠিকভাবে জানতে পারছিল না।

ঘটনার দিন নিজের কারখানার জন্য কোনাবাড়িতে কিছু মালপত্র কিনতে গিয়েছিলেন জাকির হোসেন। পরে দুপুরে একজন ক্রেতার সঙ্গে দেখা করতে রাজধানীর উত্তরার দিকে রওনা হন। পথে আব্দুল্লাহপুরে দাঁড়িয়ে বাসের জন্য অপেক্ষা করছিলেন। এমন সময় রাজধানীতে নানা স্থানে কোটা সংস্কার আন্দোলন ঘিরে ছাত্র-জনতার ওপর পুলিশের ব্যাপক হামলা চলছিল। দেশের পরিস্থিতি ভালো না ভেবে ছেলে জাকির হোসেনকে (৩৮) কল দেন তাঁর মা মোমেনা বেগম। ছেলেকে বাইরে যেতে মানা করেন। কথার একপর্যায়ে হঠাৎ বিকট আওয়াজ পান মা। এরপর আর ছেলের কোনো কথা শুনতে পাননি তিনি।

তখনই ঐ এলাকায় পুলিশের আগ্রাসী হামলাকে কেন্দ্র করে পুলিশ ও ছাত্র-জনতার ধাওয়া-পাল্টাধাওয়া শুরু হয়ে যায়। আন্দোলনকারীদের সরিয়ে দিতে বৃষ্টির মত গুলি ছোড়ে স্বৈরাচারী সরকারের আইন-শৃঙ্খলা রক্ষাকারী বাহিনী। পর পর দুটি গুলি এসে পিঠে ও পেটে লাগলে কিছু বুঝে ওঠার আগেই মাটিতে পড়ে যান জাকির হোসেন। সেখান থেকে হাসপাতালে নেওয়া হলে ১৪ ঘণ্টা পর মারা যান তিনি। পথচারীরা দ্রুত তাকে উদ্ধার করে ঢাকা মেডিকেল কলেজ হাসপাতালে নিয়ে যান। কিন্তু জীবন-মৃত্যুর এই লড়াইয়ে তিনি হার মানেন। চিকিৎসাধীন অবস্থায় ২১ জুলাই ২০২৪, ভোর ৪টা ৩০ মিনিটে শহীদ জাকির শেষ নিঃশ্বাস ত্যাগ করেন।

প্রত্যক্ষদর্শীরা জানান, হেলিকপ্টার থেকে সাধারণ মানুষের ওপর নির্বিচারে গুলি চালানো হয়েছিল। আর সেই গুলিতেই প্রাণ হারান শহীদ জাকির। তাঁর পিঠে গুলি বিদ্ধ হওয়ার প্রমাণ পাওয়া যায়।

জাকিরের পরিবার যখন তার মৃত্যুর সংবাদ পায়, তখন তারা শোকের সাগরে ভাসছিলেন। একটি সাধারণ কাজে বেরিয়ে পরিবারের একমাত্র উপার্জনক্ষম মানুষটি আর কখনও ফিরবেন না, এমনটি তাদের ভাবনাতীত ছিল। ১৯ জুলাই গুলিবিদ্ধ হওয়ার পর তাঁর পরিবারের কাছে কোনো খোঁজ পাওয়া যাচ্ছিল না, এমনকি কোনো সাহায্যের সুযোগও ছিল না কারণ পুরো দেশজুড়ে মোবাইল নেটওয়ার্কও স্লো করা ছিলো; সামাজিক যোগাযোগের মাধ্যমগুলোও ছিল বন্ধ।

আঘাত : হেলিকপ্টার থেকে গুলি করা হয়

আহত হওয়ার সময় : ১৯ জুলাই ২০২৪, বিকাল ৩:৩০

মৃত্যুর তারিখ ও সময় : ২১ জুলাই ২০২৪, ভোর ৪:০০, ঢাকা মেডিকেল কলেজ

শহীদের কবরের বর্তমান অবস্থান : চরদুর্লভ খাঁ, কাপাসিয়া, গাজীপুর